



ANG

Paghimakas

Rehiyunal sa Partido Komunista sa Pilipinas ★ Isla sang Negros

Unang Rehiyunal sa Marikina-Lungsod ng Alabang

March 2026

Padayunon ang liwat nga pagbulwak sang pagsulong kag paabantehon ang inaway banwa sa mas mataas nga halintang!

*Komiteng Rehiyunal sa Partido sa Isla sang Negros para sa
ika-57 nga anibersaryo sang New People's Army's*

March 29, 2026



Hugot nga ginasaludohan sang Komiteng Rehiyunal sang Partido sa Isla sang Negros (KRPIN) ang mga Pulang kumander kag mga hangaway sang Apolinario Gatmaitan Command (AGC-NPA), sa pagsaulog sang ika-57 nga anibersaryo sang pagkatukod sang New People's Army (NPA). Tungod sa iya hugot nga panindugan nga agumon ang matuod nga kahilwayan, kalinong kag demokrasya paagi sa pagpasulong sang demokratikong rebolusyon sang banwa paagi sa pangmalawigon nga inaway banwa, ang NPA padayon nga nakaangkon sang madamo nga mga kadalag-an kag nalampuwasan ang madamo nga mga kabudlayan sa nagligad nga tuig. Ang NIRPC malipayon nga nagapadangat sang pagpasalamat sa malapad nga masa sang Negrosanon kay kon indi sa ila wala pagkahubas nga suporta sa NPA, indi makapangibabaw ang rebolusyonaryong kahublagan sa wala puas nga brutal nga

mga atake sang reaksyonaryong armadong pwersa sang nagahari nga sahi sa rehiyon kag sa bug-os nga pungsod.

Samtang ginasaulog naton ining makasaysayan nga panahon, malahalon nga aton man dumdumon kag pasidunggan ang mga nagtaliwan nga mga baganihan kag martires sang aton rebolusyon, upod nanday Reynalde 'Ka Amek' Erecre, anay sekretaryo sang KRPIN kag political commissar sang Regional Operational Command sang AGC-NPA, 'Ka Joem' Golez, Mary Jane 'Ka Shonie' Magquilat, Reniel 'Ka Adie' Cellon, Charity 'Ka Mayang' Amacan, Jhon Dee 'Ka Dahlia' Supelanas, Jhonrey 'Ka JB' Mejares, Glenda 'Ka Glendel' Mejares, kag Ka Pitong (kolektibo nga ginatawag nga Tapi 7), Ruben 'Ka Marcos' Tingal, Ritchell 'Ka Makoy' Verano, Milky 'Ka Gorting' Sampini kag Joedil 'Ka Cairo' Balsimo kon sa diin napagkit na sa kasaysayan ang ila dedikasyon paagi sa paghalad nila sang ila

kabuhi sa pag-alagad sa pumuluyo. Upod sa iban pa nga mga martires, ang ila mga sakripisyo magaserbe nga inspirasyon sa bug-os nga rebolusyonaryong kahublagan, sa pagpakig-away batuk sa nagahari nga sahi sang manugpigos kag manughimulos.

Ginadayaw sang Partido ang NPA sa iya nagapadayon kag maid-id nga pagtib-ong sang kahublagan panadlong. Paagi sa absoluto nga pagpamuno sang Communist Party of the Philippines (CPP), ang NPA - bilang nagapanguna nga hinganiban sang pumuluyong Pilipino sa pagwasak sang nagahari nga mala-kolonyal kag mala-pyudal nga sistema - padayon nga ginapaslaw ang mga plano sang kaaway nga dugmukon ang rebolusyonaryong kahublagan. Tayuyon nga ginatib-ong sang mga Pulang hangaway ang prinsipyo sang "pagpreserba sa kaugalingon." Bisan pa sa makatalaka nga pasulit-sulit nga pahayag



sang Armed Forces of the Philippines (AFP) kag National Task Force to End Local Communist Armed Conflict (NTF-Elcac) nga ang mga 'nabalin nga NPA' na lang ang nagahulag, ang lima ka mga larangan gerilya sa rehiyon padayon nga nagarekober, nagapalapad kag nagakonsolida sang iya baseng masa kag iya kubay.

Sang nagligad nga tuig, madinalag-on nga napangibabawan sang NPA ang pagpang-ipit nga estratehiya kag taktika sang AFP, ginakambyo ang mga depensibang sitwasyon pakadto sa kontra-opensibang inisyatiba samtang padayon man gihapon nga ginatungdan ang iya integrado nga mga hilikuton sang armadong paghimakas, pagtukod sang baseng masa, kag agraryong rebolusyon. Ang grabe nga pasismo kag terorismo sang estado sang rehimen US-Marcos II mas nagpatambok pa sa duta sang rebolusyonaryong kahublagan, nga nagtuga sang pagbawi sang mga NPA sang ila nabuhian nga mga teritoryo kag nakapalapad sa mga bag-o nga erya, kon sa diin malipayon nga ginapalangga sang masa ang ila mga hangaway, tungod nakahibalo sila nga sa armadong rebolusyon lamang masolbar ang lapnagon nga problema sang kaimolon, kawad-on sang duta kag trabaho, kag impyunidad.

Dapat padayunon sang NPA ang iya liwat nga pagbulwak sang pagsulong nga may kapagsik kag determinasyon. Madamo pa

sang dapat trabahuon agud mabawi ang mga kapierdehan ilabina ang naghalin sa internal nga mga ideolohikal, politikal kag organisasyonal (IPO) nga kahuyangan kag kakulangan nga matalum nga gintumod kag amat-amat apang pursigido nga ginatadlong kag masustansir ang mga kadalag-an. Dapat segurohon sini nga ang mga Pulang kumander kag hangaway, daan man ukon bag-o, nagahiliusa sa katuyuan para sa pungsodnon nga kahilwayan sa tunga sang grabe nga mga sakripisyo kag hinanali nga mga hilikuton. Samtang nagalala kag nagasingki ang pagkadunot sang nagahari nga sistema, dapat gamiton sang NPA ang iya bug-os nga ikasarang indi lamang sa pagpangibabaw sa atake sang kaaway, kundi mapasulong ang inaway banwa.

I. Tuman ka paborable sang kahimtangan sa pagpasulong sang inaway banwa

Sa hayagan nga nagalala nga krisis, ang mga makina pang-gyera sang imperyalistang US indi na makagahum sa daan nga pamaagi kag ginabuhian ang iya kusog militar batuk sa mga kontra-imperyalistang mga pungsod kaangay sang Venezuela kag Iran, samtang padayon ang iya mga proxy nga gyera sa Palestine kag Ukraine. Tuyo sang rehimen US-Trump nga palaparon ang iya kontrol kag igiit ang iya hegemoniya sa isa ka multipolar nga kalibutan, agud mapagamay ang peligro sang China kag Russia bilang iya mga imperyalistang kasumpong. Pulaan ka libo nga mga sibilyan ang ginpamatay kag nadislokar halin sa ila mga puluy-

an samtang agresibo nga ginapukan sang US ang ila mga lideres kag ilisan sang iya kaugalingon nga ido-ido, agud kontrolon ang pungsodnon nga gobyerno kag mga ekonomiya. Sa esensya, ang paglunsar sang mga gyera sang US naghublas sa imperyalismo nga yara na sa iya pinakadesperado nga kahimtangan, indi na mapunggan ang iya sistemiko nga krisis sang sobra nga produksyon kag nagagamit na sang nagataas nga pasistang paghari kag pagpasingki sang mga gyera agresyon.

Partikular sa Pilipinas, indi na maisip ang ginahimo nga pagpang-haras sang China tungod sa pagtinguha sini nga okuparon ang mga teritoryo sang Pilipinas sa West Philippine Sea. Nagalala ang tensyon tungod sa presensya sang US sa pungsod paagi sa Balikatan kag iban pa nga pang-militar nga ehersisyo kag mga lokasyon sang Enhanced Defense Cooperation Agreement (EDCA) nga nagaserbe nga akto sang gitgitanay sang mga imperyalista, indi luyag sang US nga may mabuhian pa nga lugar para sa iya karibal nga China.

Samtang nagahilapit ang kalibutan sa isa naman ka inter-imperyalista nga gyera, ang mga neokolonya kasubong sang Pilipinas nagakaipit kag obligado nga magpakigbahin paagi sa pagsuporta sang makina pang-gyera sang US. Halos gintanyag na sa US sang

US-Marcos nga rehimen ang sobereniya sang Pilipinas paagi sa pagpasugot diri nga magtukod sang mga EDCA sites kag pagpasaka sang pagpasilabot militar. Sa subong, ang pungsod nagaserbe bilang higante nga base militar sang US kon ang tensyon sa China maglupok sa gyera, nga mangin posible nga matabo tungod sa pagka-desperado sang rehimen Trump nga magpadayon sa gahum.

Sa ekonomiya, gina-imposar ang mga neoliberal nga polisiya agud suportahan ang pagpangkawkaw sang imperyalista kag lokal nga mga burukrata, nga puno sang binilyon ka piso nga balor sang korapsyon para sa kikbak. Sa Negros, ining mga patakaran mas nga nangin agresibo, nga nagahalit sa palangabuhian sang minilyon ka mga Negrosanon, ilabi na sang mga mangunguma kag mamumugon sa uma.

Ang pagliberalisa sang kalamay mayor nga nagahalit sa mga magagmay nga plantador kag mamumugon sa kampo. Samtang nagaganansiya gikan sa indi istable nga presyo sang kalamay ang mga kumprador-agalon may duta, ang mga gagmay nga plantador nagakapilitan nga mangutang para masustehir ang ila palangabuhian tungod sa mataas nga presyo sang mga abono kag iban pa nga kinahanglanon sa pagtanum. Ilabina ang mga mamumugon sa kampo, amo ang mayor nga nagabaga sang kabudlayan tungod sa padayon nga pagbaton sang tuman ka nubo nga sweldo para lang mabuhi, nagakita lamang sila sang Php 200-400 kada adlaw (tuman ka nubo sa minimum nga sweldo), nga mas nga magnubo pa gid sa panahon sang sira galing. Ang nagapalala pa, kinahanglan sang mga pigado nga mangutang sa mga *micro-finance* kag *lending institutions* nga gina-agaw ang ila duta kag iban pa nga kolateral tungod sa pagpatuman sang tuman ka taas nga tantos sang interes.

mga tumandok, ang nagakadislokar sa ila mga puluy-an agud hatagan dalan ining mga proyekto, kaangay sang plantasyon sang *oil palm* sa Candoni nga padayon nga nagalapad, "reporestasyon" gamit ang komersyal nga mga kahoy sa Central Negros, kag lapnagon nga kwari sa lain-lain nga bahin sang Negros Occidental kag Oriental.

Ang mga proyektong reklamasyon sa kasyudaran sang Bacolod, Dumaguete, Cadiz, kag iban pa nagdislokar man sa mga imol nga tagasyudad sa tabon sang 'kauswagan'. Mas masami na ang paglaslas sang mga natural nga kalamidad, kaangay sang grabe nga pagbaha kag paglupok sang bulkan Kanlaon, nga ginpalala sa pagkabuyagyag sang korapsyon sang mga proyektong flood control, nga ang unta solusyon nahimo nga ginakitaan sang mga wala sang kabulusgan nga mga burukrata.

Ang mapangwasak nga mga proyekto (pagmina kag kwari) kag pagpananum sang mga komersyal nga kahoy nagawasak man sang palangabuhian sang mga mangunguma kag mga komunidad. Magluwas sa kahalitan sa kapalibutan, linibo ka pumuluyo, kalabanan mga mangunguma kag mga komunidad sang

Sa tabon sang pagtapna sang *climate change*, ang mga proyektong *renewable energy* kasubong sang *solar farms*, *wind mills*, *hydropower* kag mga kaangay sini nagalapta ilabi na sa Norte nga bahin sang Negros nga nagadislokar sang mga komunidad kag nagadingot sa pumuluyo sang ila malahalona nga mga resorsa kag palangabuhian.

Samtang, ang kumbinado nga AFP/PNP/NTF-Elcac nagaakto nga mga ido nga manugbantay sang sining mapangwasak nga



mga proyekto. Nagapadayon ang militarisasyon nga nagahalit sa pumuluyo sa kaumhan kag mga komunidad sa kasyudaran, kon sa diin ginalapas sang pwera sang estado ang tawhanon nga kinamatarung agud pahipuson ang mga pagpamatuk. Lapnagon gihapon ang pagpang-*redtag* sang mga progresibong mga lideres kag tagpangapin sang tawhanon nga kinamatarung, upod sa mga iligal nga pagpang-aresto, 'peke' nga pagpa-surrender, pagpamahog kag pagpangpwera, kag ekstrahudisyal nga pagpamatay, nga tanan ginahimo sang amo man nga mga mersensaryo nga mga tropa. Dugang pa, ang Barangay Development Programs (BDP), kaangay sang mga proyektong *flood control*, puno sang korapsyon, ang mga mangunguma kag mga komunidad sang tumandok padayon sa gihapon nga nagaantus sa amo man nga mapiguson nga *status quo* sa tunga sang *band-aid* nga solusyon nga ginahapag sang rehimen US-Marcos II.

II. Sa wala pagkahubas nga suporta sang masa, nagabaskog ang NPA kag nagasulong ang inaway banwa

Ginasaludohan sang Partido ang Roselyn Jean Pelle Command (RJPC-NPA), Leonardo Panaligan Command (LPC-NPA), Romeo Nanta Command (RNC-NPA), Armando Sumayang Jr Command (ASJC-NPA), kag ang Rachelle Mae Palang Command (RMPC-NPA), sa ila isganan nga pagdepensa sa pumuluyo sa tunga sang padayon nga

militarisasyon sang 302nd kag 303rd infantry brigade sang AFP sa isla. Sa subong may siyam ka mga batalyon sang AFP kag PNP kag pila ka naka-ispesyalisa nga mga yunit nga nadeploy sa rehiyon, ini agud pasingkion ang kampanyang kontra-insurehensiya sang estado sa pagpaninguha nga magliso na padulong sa "eksternal nga depensa" para mapahalipay ang ila imperyalistang agalon.

Ang linibo ka mga hilo nga nagahigot sa NPA kag masa nagapabilin nga wala mabugto. Bisan sa wala-puas nga atake sang kaaway, natigayon sang NPA nga mapalapad ang erya, nakatukod sang likom nga mga organisasyon masa sang mga mangunguma kag mga komunidad sang mamumugon sa uma. Paagi sa sosyal nga imbestigasyon kag pag-analisa sa sahi, natigayon sang mga yunit sang NPA nga maka-establisar sang mga kontak kag bag-o nga mga erya, kon sa diin ang masa nagakalangkag nga maghatag sang ila suporta sa ila matuod nga tagpangapin.


Bisan pa sa presensya sang AFP, natigayon pa gihapon sang NPA nga makonsolida ang mga nagaluntad nga organisasyon masa, kag narekober ang mga erya nga napaidalum sa masingki nga militarisasyon sang nagligad nga mga tinuig. Nagsaka sa 21% ang baseng masa kag ang organisadong masa sa 20%.

Ang mga talakayan pang-edukasyon, ginahiwat sa patago kag matinugahon nga pamaagi, agud makabulig sa pagpasaka sang

kamuklatan sang mga organisadong masa.

Ginahiwat ang hilikuton pang-propaganda batuk sa pasulit-sulit nga pahayag sang estado nga mga 'nabilin nga NPA', nga madugay na nga ginhimutig sang mga punitibong aksyon kag mga taktikal nga opensiba nga ginalunsar sang lain-lain nga mga yunit sang NPA sa bug-os nga rehiyon. Ginapaseguro man sang mga yunit sang NPA ang napanahon nga pagpaguwa sang mga pahayag kag *tit-for-tat* agud ipanginwala ang mga indi mapatihan nga mga pahayag sang AFP. Ang iban nga mga larangan gerilya nagpaguwa man sang mga pahayagan para matalakay ang mga lokal nga mga isyu.

Muklat sa iya mayor nga hilikuton sa paglunsar sang armadong paghimakas, ang NPA halin March 25, 2025 nakalunsar sang 56 ka aksyon militar sa lain-lain nga tipo kag kasangkaron kag nakakumpiskar sang 16 ka mga armas, upod sa mga magasin kag mga bala. Nasilutan man ang mga



aset pang-inteledyens kag iban nga indibidwal nga may utang nga dugo batuk sa pumuluyo kag sa rebolusyon sandig sa pagsulundan sa rebolusyonaryong hustisya. Ang mga mapangwasak nga mga operasyon nga wala nagarespeto sa otoridad sang rebolusyon ginsilutan man, kasubong sang operasyon kwari sa Sityo Sigang, Barangay Carabalan, Himamaylan City, Negros Occidental.

Permi man ginahanas ang mga Pulang hangaway sa pulitika kag militar. Ang PADEPA (Pambansang Demokratikong Paaralan) kag mga kurso sang Partido gina-integrar upod sa matag-adlaw nga hilikuton agud segurohon nga armado sila mayor sang kamuklatan pang-pulitika upod sa ikasarang pang-militar kag disiplina, bilang kumprehensibo nga mga hangaway nga makasarang mag-away sa kaaway kag makapukaw, maka-organisa, kag maka-mobilisa sa pumuluyo sa pangmalawigon nga inaway banwa.

Samtang padayon nga hugot nga ginapabilin sang NPA ang iya linyang masa, ang ginahimuslan nga masa nakabig indi lang sa pagsuporta kag pagpalangga sa mga hangaway, kundi subongman sa pagpatapo diri. Ang mga pamatan-on halin sa mga komunidad sang mangunguma kag bisan pa mga erya sa kasyudaran nagalubog sa mga yunit sang NPA, para sa eksperyensya sang *tour-of-duty* kag bisan pa lubos panahon nga mga bag-o nga Pulang hangaway. Ang pabalik-balik nga

propaganda sang AFP nga mga 'nabalin' nga NPA ang padayon nga nagahulag sa mga larangan gerilya indi matuod, tungod sa mga preska nga dugo nga padayon nga nagapapagsik sang kubay sang NPA.

Agud buligan ang masa sa tunga sang nanari-sari nga mga *band-aid* nga solusyon nga ginahapag sang mga mersenaryong AFP nga wala nagasabat sa ugat sang kaimolon, ginabuligan sang mga yunit sang NPA ang mga kampanya sa pagpasaka sang sweldo sang mga mamumugon sa kampo kag pagpasaka sang presyo sang produkto halin sa uma nga gina-organisa kag ginapamunuan sang mga asosasyon ukon tsapter sang Pambansang Katipunan ng Magbubukid (PKM).

Ginatos ka mga masa ang napahulag agud magdemanda para pasakaon ang ila sweldo, kag pagpamatuk sa pagpalapad sang mga dumuluong kag ekspansyon sang lokal nga mga negosyo nga nagahalit sang ila mga *farmlots* kag puluy-an.

Paagi sa absoluto nga pagpamuno sang CPP, ginakilala sang NPA ang iya papel bilang nagapanguna nga hinganiban para mapaabanse ang armadong rebolusyon kag ang pangmalawigon nga inaway banwa. Sugod sang ginpatuman ang nagapadayon nga kahublagan panadlong sadtong 2023, nagpanguna ang NPA agud mapaseguro nga mapangibabawan ang kahuyangan sang empirismo, konserbatismo, kag burukratismo. Gina-armasan sa ideolohiya sang Marxismo-Leninismo-Maoismo (MLM), ang mga Pulang hangaway amo ang mayor nga makinarya

sang Partido agud malab-ot ang madamo pa nga kadalagan para sa rebolusyon sa dalagan sang pangmalawigon nga inaway banwa tubtob sa himpit nga kadalagan.

III. Mapang-away nga mga hilikuton

Ang madasig nga pagsarurot sang imperyalista kag ang indi malikawan nga mga negatibo nga epekto sa mga neokolonya kasubong sang Pilipinas nagalatag sang mas matambok pa nga duta para magsulong ang armadong rebolusyon. Sa kasaysayan, sa panahon sang mga inter-imperyalista nga mga kagamo, nagasanyog ang rebolusyon kag bisan pa gani magdaog tungod sa paborable nga obhetibong kahimtangan kag madasig nga pagdamo sang mga suhetibong pwersa.

Dapat handa ang NPA nga mag-agum sang madamo pa nga kadalagan sa masunod nga tuig, santo sa panawagan sang Partido nga pasingkion ang inaway banwa sa tunga sang nagalala nga pangkalibutan kag pungsodnon nga krisis. Tuman ka kinahanglanon nga muklat ang NPA nga ipatuman ang iya hilikuton, bilang hukbo sang mga mangunguma, agud mapahulag ang mga mangunguma kag mamumugon sa uma sa ila linibo para maglunsar sang kontra-imperyalista, kontra-pyudal, kontra-pasista nga mga kampanya agud pangapinan kag igiit ang ila kinamatarung kag kaayuhan

batuk sa terorista nga rehimen US-Marcos II.

Dapat padayon ang NPA nga maglunsar sang mga taktikal nga opensiba batuk sa kaaway santo sa ila ikasarang kag mga aksyon militar nga ila masarangan nga daugon. Dapat magpakamaayo ini sa arte sa pagbalanse sang mga atritibo kag anihilatibo nga mga aksyon, santo sa prinsipyo sang "linibo ka igo sa lawas kag pila ka napanahon nga patal nga igo sa ulo." Dapat aktibo nga makatipon sang inteledyens ang mga yunit tuhoy sa pinakanaligwin kag pinakahuyang nga yunit sang AFP, PNP kag paramilitar, kag segurohon nga makakumpiskar sila sang armas, agud mapaarmasan ang mga bag-o nga rekrut. Samtang, dapat maghimo sang mga tikang nga mapabilin nga bulag kag bungol ang kaaway sa nahamtangan kag mga hulag sang mga yunit agud mapabilin ang pagkasekreto kag mapasiguro ang sorpresa nga mga atake, kag dapat handa permi ang mga Pulang kumander kag hangaway nga mag-away kag agawon ang inisyatiba sa tion sang kontra-opensiba nga sitwasyon. Dapat padayon sini nga ipatuman ang mga punitibong aksyon batuk sa mga monopolyong kapitalistang mga korporasyon upod sa mga operasyon sang mga kumprador nga mangtas nga nagapangkawkaw sa mga dunang manggad sang isla nga nagatuga sang dislokasyon kag kahalitan sa palangabuhian sang pumuluyo kag kapalibutan. Bisan ang mga nagahari nga

mga sindikato kag mga lider sang baligyaanay sang droga sa isla ipaidalum man sa mga punitibong aksyon bangud padayon nila nga ginahuthot ang katapusan nga sentimo sang pumuluyo kag ginawasak ang panghuna-huna sang mga pamatan-on kag ginaliso ang ila ikasarang sa pagpukaw, pag-organisa kag pagmobilisa sang ila kubay agud magtuga sang radikal nga pagbag-o sa sosyedad paagi sa pagbuylog sa rebolusyonaryong kahublagan paagi sa NPA.

Ang mga kontra-rebolusyonaryong elemento kag yadtong nakahimo sang krimen batuk sa pumuluyo kag sa rebolusyon dapat nga taralon sa rebolusyonaryong korte sang pumuluyo kag masilutan santo sa ila krimen. Dapat madalom nga magtuon ang NPA sa kinatuhay sa tunga sang kontradiksiyon sang pumuluyo batuk sa nagahari nga sahi kag yadtong sa tunga sang pumuluyo mismo, agud makahatag sang nagakaigo nga solusyon tuhoy sa mga problema nga ginaatubang sang masa.

Dapat man padayunon ang tayuyon nga propaganda batuk sa mga yawyaw sang AFP kag NTF-Elcac. Dapat wala kataka kag wala-untat ang pagbuyagyag sang mga yunit sang NPA sa mga korap, indi mapatihan, kag mga binutig nga ginapahayag sang kaaway. Dapat madasig nga pungan sang mga yunit sang NPA ang matiplangon nga balita kag mga estorya nga nagatuyo nga higkuan ang prestihiyo sang Partido kag sang armadong rebolusyon.

Dapat padayunon sang mga Pulang hangaway ang pagpalapad kag

konsolidasyon sang ila matag-baseng masa. Dapat may muklat nga pagtinguha nga balansehon ining duha. Ang pagpalapad kinahanglan para sa pagpalapad sang sosyal kag pisikal nga tereyn sang maniobra, samtang ang konsolidasyon kinahanglanon man para sa pagpadalum sang baseng masa kag pagpataas sang lebel sang mga likom nga organisasyon masa, halin sa grupong pang-organisa padulong sa komiteng pang-organisa, asosasyon masa, kag komiteng rebolusyonaryo sa baryo. Dapat man kunsiderahon ang hilikuton pang-rekoberi, ilabi na sa mga lugar nga ginpangwasak sang mga korap nga Barangay Development Projects kag iban pa nga mga neoliberal nga mga proyekto nga nagabutang sa peligro sang ila mga komunidad kag palangabuhian.

Dapat hiwaton ang mga talakayan pang-edukasyon sa madasig, malip-ot, kag likom nga pamaagi. Ang mga sandigan nga mga kurso sang PADEPA, (MKKRP, ArAk, SMC 3-in-1, RGRY, CARHRIHL, DigBay kag iban pa) dapat ihatag sa mga organisasyon masa agud mapasaka ang ila pang-pulitika nga paghangup kag partisipasyon sa inaway banwa. Dapat man muklat ang NPA nga maghanas sang mga bag-o nga instruktur gikan sa mga Pulang hangaway kag mga organisasyon masa agud mapalapnag ang mga rebolusyonaryong propaganda sa mas malapad nga sakop. Dapat man dun-an ang mga

paghanas pang-kultura agud masumpong ang komersyalisado, kolonyal, kag pasistang kultura nga ginapalapnag sang nagahari nga sahi.

Magluwas sa mga paghanas pang-pulitika, dapat man maghiwat sang paghanas pang-militar ang mga yunit sang NPA. Ang Sandigan nga Paghanas Pulitiko-Militar kag iban pa nga modyul pang-militar dapat iupod sa matag-adlaw nga hilikuton agud mapaseguro nga ang NPA may ikasarang kag disiplinado nga mga hangaway. Pwede ini matigayon sa indi tayuyon ukon istagerd nga pamaagi santo sa nagaluntad nga sitwasyon militar.

Dapat man ilunsar ang mga kampanyang masa tuhay sa sweldo kag benepisyu, kag sa panahon sang mga natural nga kalamidad kag mga kasubong sini. Dapat tayuyon nga nagapatigayon sang sosyal nga imbestigasyon kag pag-analisa sa sahi ang NPA agud mahangpan kag makahatag solusyon sa mga problema sang masa. Ang agraryong rebolusyon amo ang solusyon batuk sa mala-pyudal kag pyudal nga pagpanghimulos, kag ang paghilway sa masa sa sini nga kabudlayan integrado nga bahin sang demokratikong rebolusyon sang banwa. Ang mga madinalag-on nga mga kampanyang masa makapatuhaw sang madamo nga mga rekrut para sa NPA.

Dugang pa, dapat padayon nga mag-rekrut ang mga yunit sang NPA gikan sa mga komunidad sang mangunguma ilabi na mga

pamatan-on. Subongman, dapat iupod sang mga likom nga organisasyon masa kag mga lokal nga sanga sang Partido ang rekrutment sa ila mga programa. Gina-abi-abi man ang mga rekrut halin sa kasyudaran. Dapat ipaseguro sang mga yunit nga ang mga bag-o nga rekrut mahanas sa pulitika kag militar, kag engganyuhon ang mga naga-*tour-of-duty* nga magkomiter nga mangin lubos panahon nga mga Pulang hangaway pagkatapos sang pila ka semana ukon bulan sang eksposyur sa rebolusyonaryong hilikuton.

Dapat padayunon ang pagtukod sang mga yunit sang milisya kag mga yunit sang seksyon gerilya. Bisan nga indi sila lubos panahon, nagabulig sila sa mga yunit sang NPA sa maniobra, lohistika, kag bisan pa mga taktikal nga opensiba agud maseguro ang kadalag-an. Dapat man sila maarmasan sang pulitiko-militar nga paghanas, tungod makabulig sila sa paglunsar sang mga atritibo nga mga aksyon agud malapta ang atensyon sang kaaway kag atakehon sila gikan sa likod.

Dapat susteneron ang liwat nga pagbulwak sang pagsulong nga inspirado sang nagapadayon nga kahublagan panadlong. Sa nagahari nga sistemang mala-kolonyal kag mala-pyudal nga hayagan na nga nagakadunot kag nagakaligwin sa mayoriya sang pumuluyo, dapat makahason nga magpanikasog ang mga NPA nga paabantehon ang inaway banwa sa mas mataas nga halintang. Samtang padayon nga nagalala ang mga inhustisya kag pasismo, ang kakinahanglanon sang

armadong paghimakas mas labi nga makatarunganon kag kinahanglanon.

Upod sa wala naga-puas nga suporta sang ginahimuslan kag ginapigos nga masa, ang Pulang hukbo magasanyog. Dapat magmaisog ang mga Pulang hangaway kag mga kumander nga magkuha sang mas mabug-at nga mga panghangkat kag mga responsibilidad sa masunod nga maabot nga mga tinuig. Paagi sa inspirasyon sang aton mga martires, dapat makig-away ang NPA tubtob sa katapusan para sa matuod nga kahalwayan kag demokrasya.



**Padayunon ang liwat nga pagbulwak sang pagsulong kag
paabantehon ang inaway banwa sa mas mataas nga halintang!**

Pakig-awayan ang makina pang-gyera sang imperyalista!

Mabuhay ang CPP-NPA-NDF!

Mabuhay ang ika-57 nga anibersaryo sang New People's Army!